

氣難干中疎得止至一飽則種子一服再煎一湯
水二匙薑三片鉢水人豆短一匙葱白一匙醋從一匙
麻辛煎
散一石 蒼朮 川芎 蘇枳
芍黃 甘草 黃芩 石膏

傷寒一提金卷之四

餘杭節菴陶華述

新安吳中珩校

一提金啓蒙

余謂初學醫者先熟藥性次明經絡再識病名然後
講解脉理以證其所生病證脉相同藥無不應病家
云發熱惡寒頭項痛腰脊強則知病在太陽經也身
熱目痛鼻乾不得眠則知病在陽明經也腦脇痛耳
聾口苦舌乾往來寒熱而嘔則知病在少陽經也腹

一提金

卷之四

一抄
卷四
滿咽乾手足自溫或自利不渴或腹滿時痛則知病
在太陰經也引衣踈卧惡寒或舌乾口燥則知病在
少陰經也煩滿囊縮則知病在厥陰經也潮熱自汗
譫語發渴不惡寒反惡熱揭去衣被揚手擲足或發
斑黃狂亂五六日不大便則知病在正陽明胃腑病
也設若脉證不明誤用麻黃令人汗多亡陽誤用承
氣令人大便不禁誤用姜附令人失血發狂正為寒
涼耗其胃氣辛熱損其汗液燥熱助其邪熱庸醫殺
人莫此為甚傷寒之邪實無定體或入陽經氣分則
太陽為首其脉必浮輕手便得或入陰經血分則少

陰為先其脉必沉重手方得浮而有力無力是知表
之虛實沉而有力無力是知裏之寒熱中而有力無
力是知表裏緩急脉有浮沉虛實證乃傳變不常治
之之法先分表裏寒熱陰陽虛實標本先病為本次
病為標先以治其急者此為上工問證以知其外察
脉以知其內全在活法二字不可拘於日數但見太
陽證在直攻太陽但見少陰證在直攻少陰但見真
寒直救真寒但見三證具便作主張不必悉具當如
何處治此為活法若同而異者明之侶是而非者辯
之在表者汗之散之在裏者利之下之在上者因而

越之下陷者升而舉之從乎中者和解之直中陰經者溫補之若解表不開不可攻裏日數雖多但有表證而脈浮者尚宜發散此事不明攻之爲逆經云一逆尚引日再逆促命期若表證解而裏證具者不可攻表日數雖多但有裏熱證而脈沉實者急當下之此事不明禍如反掌經云邪熱未除復加燥熱抱薪積火矣如直中陰經真寒證然無熱惡寒不渴急宜溫補切禁寒涼此事不明殺人甚速經云非徒無益而反害之陰證侶陽者溫之陽證侶陰者下之陽毒者分輕重下之陰毒者分緩急溫之陽狂者下之陰

厥者溫之濕熱發黃者利之下之血證發黃者清之下之發斑者清之下之譫語者下之溫之痞滿者消之瀉之結胸者解之下之太陽證侶少陰者溫之少陰證侶太陽者汗之衄血者解之止之發喘者汗之下之咳嗽者利之解之正傷寒者大汗之大下之感冒暴寒者微汗之微下之勞力感寒者溫散之溫極病者微解之大下之此經常之大法也有病一經已用熱藥而又用寒藥如少陰證用白虎湯四逆散寒藥者少陰證用四逆湯真武湯熱藥者庸俗狐疑詎能措手哉嗚呼能啓傷寒之證名而得傷寒之方脈

如此親切乃爲良醫是知寒藥治少陰乃傳經熱證也是知熱藥治少陰乃直中陰經之寒證也辯名定經明脈識證驗證用藥直知在表而汗真知在裏而下真知直中陰經而溫如此而汗如彼而下又如彼而溫幸熱之劑投之不差寒涼之藥用之必當病奚逃乎瀕分輕重緩急老少虛實久病新發婦人胎產室女經水大凡有胎產而傷寒者不與男子傷寒同治法無胎產者治相同婦女經水適斷適來寒熱但瘧者即是熱入血室但當和解表裏久病者過經不解壞證也新發者始病也老者血氣衰少者血氣壯

者病之輕急者病之重寒藥熱服熱藥涼服其中和之劑溫而服之戰汗分爲四證要知邪正盛衰類傷寒四證照常法則治之雖云發蒙實登仲景之梯階也余雖專傷寒科必出乎庸俗誇誕之醫萬萬且余一生所蓄肺腑家秘語句方法俱已備載發揮窺我門墻者雖有多人然片言不繁之要不得再四經目講明故述啓蒙捷法脈要貫珠數一一開註明白所示自宜謹慎深密勿授受於非人毋輕泄於澆薄莫負我之用心耳

一提金六經證治捷法

太陽經見證法

頭項痛腰脊強發熱惡寒惡心是足太陽膀胱經受證假如先起惡寒者本病已後發熱者標病若有一毫頭痛惡寒身熱不拘日數多少便宜發散自然熱退身涼有何變證

辯證法

表虛自汗者為風傷衛氣宜實表
表實無汗者為寒傷榮血宜發表

診脈法

脈浮緊有力為傷寒

脈浮緩無力為傷風

用藥法

冬月正傷寒用升陽發表湯即加減麻黃湯

冬月傷風用疎邪實表湯即加減桂枝湯

春秋無汗用羌活冲和湯發表有汗用加減冲和湯實表

夏月無汗用神木湯有汗用前加減冲和湯

陽明經見證法

目痛鼻乾不眠微惡寒是足陽明胃經受證假如先起目痛惡寒身熱者陽明經本病已後潮熱自汗譫

語發渴大便實者正陽明胃腑標病本宜解肌寒宜急下只看消息用之

辯證法

目痛鼻乾微惡寒身熱病在經

潮熱自汗譫語發渴便實不惡寒病在腑

診脈法

脈見微洪為經病

脈見沉數為腑病

用藥法

微惡寒自然目眶痛鼻乾不眠者用柴葛解肌湯即

加減葛根解肌湯渴而有汗不解者如神白虎湯

加減白虎湯

潮熱自汗譫語發渴揭去衣被揚手擲足斑黃狂亂

不惡寒反怕熱大便實者輕則大柴胡湯重則三承

氣選用俱在秘方六一順氣湯內加減治之

少陽經見證法

耳聾脇痛寒熱嘔而口苦是足少陽膽經受證假如

先起惡寒身熱耳聾脇痛者本病已後嘔而舌乾口

苦者標病緣膽無出入病在半表半裏之間止宜小

柴胡湯加減和解表裏治之再無別湯本方自有

一 辨證法
加減法此經有三禁不可汗下吐也若治之得法有
何壞證常須識此宜當審焉

辨證法

耳聾脇痛寒熱嘔而口苦舌乾便屬半表半裏證不
從標本從乎中治

診脈法

脈見弦數本經證

用藥法

耳聾脇痛寒熱嘔而口苦舌乾者用柴胡雙解飲即
加減小柴胡湯

太陰經見證法

腹滿自利津不到咽手足溫者是足太陰脾經受證
假如先起腹滿咽乾者本病已後身目黃標病內有
寒熱所分不可混治臨病之際用在得宜

辨證法

腹滿咽乾發黃者屬腑熱

自利不渴或嘔吐者屬臟寒

診脈法

脈見沉而有力宜當下

脈見沉而無力宜當溫

用藥法

腹滿咽乾手足溫腹痛者桂枝大黃湯即加減桂枝湯身目黃者茵陳大黃湯即加減茵陳湯自利不渴或嘔吐者加味理中飲即加減理中湯重則回陽救急湯即加減四逆湯

少陰經見證法

舌乾口燥是足少陰腎經受證假如先起舌乾口燥者本病已後譫語大便實者標病至陰經則難拘定法或可溫而或可下因分直中者寒證傳經者熱證是其發前人之所未發也

辨證法

大要口燥舌乾渴而譫語大便實者知其熱須詳嘔吐瀉利不渴或惡寒腹痛者別其寒

診脈法

脈見沉實有力宜當下
脈見沉遲無力宜當溫

用藥法

口燥咽乾渴而譫語大便實或遶臍硬痛或下利純清水心下硬痛者俱是邪熱燥屎使然急用六乙順氣湯分輕重下之即承氣湯有加減法無熱惡寒厥

冷踈卧不渴或腹痛嘔吐瀉利沉重或陰毒手指甲
唇青嘔逆絞痛身如被杖面如刀刮戰慄者俱是寒
邪中裏使然急用回陽救急湯温之即四逆湯有加
減法

厥陰經見證法

煩滿囊拳者是足厥陰肝經受證假如先起消渴煩
滿者本病已後舌卷囊縮者標病亦有寒熱兩端不
可槩作熱治

辯證法

煩滿囊拳消渴者屬熱

口吐涎沫不渴厥冷者屬寒
作瘧不嘔清便必自愈

診脈法

脈沉實者宜當下

脈沉遲者宜當温

脈浮緩者病自愈

用藥法

消渴煩滿舌卷囊縮大便實手足乍冷乍温者急用
六乙順氣湯下之即承氣湯有加減法口吐涎沫或
四肢厥冷不温過乎肘膝不渴小腹絞痛嘔逆者急

用茱萸四逆湯溫之即回陽救急湯自有加減法

一提金脉要

或人問曰治傷寒先明脉證脉證不明取方無法脉證既明工中之甲夫脉之一字實先天後天之造化何爲先天何爲後天何爲脉也答曰人之陰陽即爲先天人之氣血即爲後天脉者非血非氣乃血氣之先即營行之道路又問曰既知先後天之脉理須明持脉之要曰舉曰按曰尋三字若此不明則陰陽表裏虛實何以別之持脉者輕手循之曰舉重手取之曰按不輕不重委曲求之曰尋初持輕手候之脉見

皮膚之間便得曰浮是太陽經脉也有力者主寒邪在表無汗爲寒傷榮血表實者宜汗之無力者主風邪在表有汗爲風傷衛氣表虛者宜實之脉附於肌肉之下筋骨之間而得曰沉是三陰經脉也其三陰俱是沉脉妙在指下有力無力中分有力者主熱邪在裏爲裏實宜下之無力者主寒邪中裏爲裏虛宜溫之不輕不重中而取之乃得其脉應於血肉之間陰陽相半若見微洪是陽明經脉也主邪在表多裏少宜解肌若見弦數是少陽經脉也主邪在半表半裏宜和解前之所云陰陽表裏虛實寒熱俱在浮中

沉三脉有力無力中分有力者爲陽爲實爲熱無力者爲陰爲虛爲寒若浮沉中之不見則委曲而求之若隱若見則陰陽伏匿之脉也三部皆然或曰君之了然非庸俗所能識也其三脉中有進退焉有伏脉焉有可解不可解焉有歇至焉有燥亂焉請備言其所由谷曰脉大者爲病進大則邪氣勝而正氣無權脉緩者爲邪退緩則胃氣和而邪氣無權何謂伏脉一手無脉曰單伏兩手無脉曰雙伏若病初起頭痛發熱惡寒而脉伏者緣陰邪陷於陽中不得發越此欲汗而當攻之使邪氣退而正氣復脉自至而病自

除如欲雨則天鬱熱晴霽天乃反涼之可見也若七八日以來別無刑尅證候或昏冒不知人事或脉全無者此欲汗而勿攻之如六合陰晦雨後庶物皆甦換陽之吉兆也何謂可解不可解脉浮緩在表者以汗解之脉沉實在裏者以下解之脉沉遲在裏者以溫解之且夫浮汗沉下而溫固其宜也然浮宜下沉宜汗其故又何耶谷曰浮而下者因大便難也設使大便不難豈敢下乎沉而汗者因表有熱也設使身不發熱豈敢汗乎何謂歇至如寒邪直中陰經溫之而斷續者爲歇至何謂燥亂因汗下後脉當靜今反

盛者曰燥亂大凶之兆也然則君之言有所據乎吁
難言也此出經常大法之格語也客欣然起而謝曰
予雖白首無窮生平仰慕不意邂逅幸獲開予茅塞
正謂鼯鼠而發千鈞之弩甚所不當可謂切而磋琢
而磨者也較今庸俗實醯雞坎蛙不知甕外之有天
井外之有海耳感君發明于後豈非再來人乎遂筆
錄以示之

提金貫珠數

交霜降至春分冬日發者爲正傷寒表證見者用辛
熱之藥大發汗裏証見者用寒涼之藥急攻下此與

非時傷寒不同治方論開的本槌法中不再錄

交春分至夏至前有頭疼發熱不惡寒而渴者爲溫
病用辛涼之藥微解肌不可大發汗裏証見者用寒
涼之藥急攻下若誤下之未必爲害誤汗之變不可
言當須識此三月後得此證者爲晚發治發同表證
不與冬時正傷寒同治法裏証治相同方論開在的
本槌法中不再錄

交夏至後有頭疼發熱不惡寒而渴此名溫病愈加
熱者名熱病止用辛涼之藥微解肌不宜大發汗裏
証見者止用大寒之藥急攻下表証不與正傷寒同

治法裏證治相同方論開在的本槌法中不再錄
及秋至霜降前有頭疼發熱不惡寒身體痛小便短
者名溫病亦用辛涼之藥加燥劑以解肌亦不宜大
發汗裏證見者用寒涼藥急攻下表證不與正傷寒
同治法裏證治相同方論開在的本槌法中不再錄
其春夏秋三時有患頭疼身熱亦有惡寒者即是感
冒非時暴寒之輕非比冬時正傷寒之重俱用辛涼
之劑小發汗若裏證見者用寒涼之藥急攻下表證
不與正傷寒同治法裏證治相同方論開在的本槌
法中不再錄

其四時有患頭疼發熱惡寒身體倦痛骨腿酸疼自
汗出口微渴脉空浮大而無力名勞力感寒證當用
溫涼之劑溫經散寒切禁大發汗裏證見者中和之
劑加轉藥微下之不可急攻利方論開在的本槌法
中不再錄

其四時有患頭疼身熱惡寒老幼相傳者名時疫證
用辛涼之藥微解表裏證見者急攻下從病制宜不
與正傷寒同治法方論開在的本槌法中不再錄
若先起頭疼發熱惡寒已後傳裏頭疼惡寒皆除而
反怕熱發渴譫語或潮熱自汗大便不通或獨云衣

被揚手擲足或發斑黃狂亂此為陽經自表傳入陰經之熱證俱當攻裏下之設或當下失下而變出手足乍冷乍溫者因陽極發厥即陽證假陰名陽厥急當下之又有失於汗下或本陽證誤投熱藥使熱毒入深陽氣獨成陰氣暴絕登高而歌棄衣而走罵詈叫喊燥渴欲死面赤眼紅身發斑黃或下利赤黃六脈大名陽毒發斑證用酸苦之藥令陰氣復而大汗解矣如大便實者又當大寒之藥下之此與發狂不同治方論開在的本槌法中不再錄

若初病起無頭疼無身熱就便怕寒厥冷腹痛嘔吐瀉利不渴蹠臥沉重戰慄脈沉細此為直中陰經真寒證不從陽經傳來當用熱藥溫之如寒極而手足厥冷過乎肘膝者因寒極發厥名陰厥急當救裏溫之此與陽厥不同治又有初病起外感寒邪內傷生冷內既伏陰內外皆寒或本真陰誤投涼藥使陰氣獨盛陽氣暴絕以致病起手足厥冷腰背強重頭眼睚痛嘔吐煩悶下利腹痛身如被杖六脈沉細湯飲不下已後毒氣漸深入腹攻心咽喉不利腹痛轉甚心下脹滿結硬如石燥渴欲死冷汗不止或時鄭聲指甲面色青黑速灸關元氣海瀕服大熱之劑溫之

此名陰毒令陽氣復而大汗解矣

若夏月大發熱頭疼燥渴背惡寒微汗脉虛無力口
齒燥者名中暑用寒涼之劑清之方論開在雜證中
不再錄

若病人身微熱煩燥面赤戴陽欲坐卧於泥水井中
脉來沉細無力此陰發燥名陰燥當用辛熱之藥温
之不宜涼劑誤用之其燥急渴甚必死矣若病人身
冷脉沉細而疾雖煩燥不欲傾水入口者此名陰盛
格陽亦用大熱之劑温之方論開在的本槌法中不
再錄

一傷寒失於汗下使熱邪傳裏燥渴譫語小水自利
大便黑小腹硬痛或身黃是下焦蓄血如狂證此與
陽狂不同治宜下盡黑物則愈方論開在的本槌法
中不再錄

一傷寒初得病與表熱但狂言煩燥不安精采不與
人相當此因熱結膀胱其人如太陽經之裏證也自
有太陽經之裏藥治不與陽狂同治法方論開在的
本槌法中不再錄

一傷寒小水不利大便實小腹滿燥渴譫語怕熱身
目黃此名濕熱發黃輕則疎利重則大下此與血證

發黃不同治方論開在的本槌法中不再錄

一傷寒失於汗下血熱不散故成發斑大抵不宜發

汗輕則化之重則下之起於腦腹先紅後赤者曰發

斑起於手足先紅後黃者曰蚊迹臨病之際宜詳審

焉方論開在的本槌法中不再錄

一傷寒少陰證惡寒發熱無頭疼誤以大發汗使血

從耳目口鼻中出者名陰血多不治此與鼻衄陽血

不同治方論開在的本槌法中不再錄

一傷寒太陽證發熱惡寒頭痛或微喘鼻中出血者

為衄血名陽血瀕分點滴成流此與陰血不同治方

論開在的本槌法中不再錄

一傷寒失於汗下邪熱傳裏使水澀糞燥大便不通

必發譫語或心下硬痛下利純清水燥渴口出無倫

語亦譫語凡此皆實當寒涼之劑下之又有汗多亡

陽或下後利不止身疼痛或自利清穀譫語者凡此

皆虛當辛熱之劑溫之此與狂言相類方論開在的

本槌法中不再錄

一傷寒餘熱不除蘊在心胞使精神短少冒昧昏沉

睡中言語一二句者名獨語宜涼劑清之此與譫語

不相類方論開在的本槌法中不再錄

一傷寒因汗下後正氣虛而本音失則鄭重語散不知高下大小便自利手足冷名齟聲宜中和之劑治之此與獨語不相類方論開在的本槌法中不再錄

一傷寒差後交接淫慾無病人反得病者名陰陽易宜清涼解毒之劑治之此與女勞復不相類方論開在的本槌法中不再錄

一傷寒差後交接淫樂不因易自病復發者名女勞復與前陰陽易同治法方論開在的本槌法中不再錄

一傷寒失於汗下或因汗下後虛令人氣逆不相接

續者名短氣分虛實治之此與喘證不相類方論開在的本槌法中不再錄

一傷寒失於汗下或因口飲水過多令人擡肩擗肚氣逆上者名發喘分表裏水氣治之此與短氣不相類方論開在的本槌法中不再錄

一傷寒麻黃湯證誤下之心下滿悶不痛者名痞氣分虛實治之此與結胸不相類方論開在的本槌法中不再錄

一傷寒桂枝湯證誤下之心下滿硬而痛名結胸分緩急治之此與痞滿不相類方論開在的本槌法中

不再錄

一傷寒證病一陽經或三陽經同病不傳者名合病分在經過經治之此與併病不相類方論開在的本槌法中不再錄

一傷寒證一陽經先病未盡又過一經之傳者名併病分在經在腑治之此與合病不相類方論開在的本槌法中不再錄

一傷寒或汗下大過或恣飲冷水水寒相搏虛逆聲濁惡而長名噦此與乾嘔不相類輕則和解疎利重則溫散方論開在的本槌法中不再錄

一發熱在胃口與谷氣併熱氣上薰無物名乾嘔惡寒熱水氣治之此與噦證不相類方論開在的本槌法中不再錄

一傷寒有頭疼發熱惡寒脉沉此名太陽脉但少陰當辛溫之劑散之與少陰證不相類方論開在的本槌法中不再錄

一傷寒無頭疼止則發熱惡寒脉沉此名少陰證但太陽當辛溫之劑散之與太陽證不相類方論開在的本槌法中不再錄

一傷寒頭疼惡寒身熱者名表熱以辛散之與裏熱

不相類方論開在的本槌法中不再錄

一傷寒與頭疼無惡寒反怕熱燥渴口苦舌乾譫語

大便實名裏熱此與表熱不相類方論開在的本槌

法中不再錄

一傷寒頭疼身熱惡寒者名表惡寒當辛甘散之此

與裏惡寒不相類方論開在的本槌法中不再錄

一傷寒無頭疼無身熱而惡寒厥冷蹇卧不渴或吐

瀉腹痛戰慄者名裏惡寒當辛熱之劑溫之此與表

惡寒不相類方論開在的本槌法中不再錄

一提金卷之四

終

傷寒證脉藥截江綱卷之五

餘杭節菴陶華述

新安吳中珩校

傷寒

傷寒之病非比雜科乃大方脉之首務也其間脉理

精深良震無常死生反掌甚所難明苟或有稱治傷

寒者未免羊質虎皮然則名譽虛隆而實德則病矣

余早年盲學昏昏如蠅觸牖後得漢長沙張仲景先

師治法所得石函遺著名曰遺芳嘉秘玩而誦之以